

■ TAVAU

60 letgs
supplementars

(fmr/gns) La vischnanca ed il spital da Tavau han communitgà glindesdi ch'il dumber da persunas infectadas dal coronavirus saja danovamain s'augmentà. Ultra da quai saja la controlla d'access tar il parcadi dal spital e tar l'entrada da quel dapi sonda en funcziun. La vischnanca ed il spital dal lieu cun passa 10 000 abitants ha lura er communitgà che la Clinica alpina Tavau renunzia pervia da la problematica dal coronavirus da na far sco prevì quest onn la sanaziun e renovaziun da la clinica. La vischnanca ed il spital da Tavau sajan ventiraivels da quella decisiun, è da leger en la comunicaziun. En cas necessari haja il spital ussa in post extern cun supplementar 60 letgs cunzunt per pazients na pertutgads dal coronavirus. Vinavant sajan ils abitants da Tavau sur 65 onns dependents d'agid dad autras persunas, e perquai appellescha la vischnanca a tuts voluntaris da s'annunziar online tar la vischnanca.

■ RTR

Elecziun da
directur/a sistida

(fmr/mc) Sco quai ch'il parsura da SRG.R Vincent Augustin ha confermà vers la FMR, vegn l'elecziun d'ina nova directura u d'in nov directur da RTR spustada ad interim. Quai betg per mancanza da candidatas e candidats qualificgads. «Nus avain pliras fitg bunas annunziats», ha accentuà Augustin. La raschun per la spustada da l'elecziun sin il zercladur saja la crisa da sanadad actuala che tangheschia tut las unitads da la SRG SSR, ed il squitsch ch'eria gia grond avant questa crisa, creschia adina dapli. «D'ina vart emprova la SRG SSR da proteger la sanadad da sias collavuraturas e ses collavuratur, e da l'autra vart fa ella sforzs extraordinaris per infurmar la populaziun e per adattar ses program a la situaziun actuala», di Augustin.

En vista a questa situaziun difficila han il president da la SRG SSR Svizra Rumantscha, Vincent Augustin, ed il directur general da la SRG SSR, Gilles Marchand, decidì d'interromper la procedura da designaziun d'ina nova directura/ d'in nov directur RTR. Las mesiras da prevenziun necessarias e la prioritad da l'interpresa na pussibiliteschjan betg da cuntinuar la procedura sut cundiziuns regularas. Quai tant pli che ils differents gremis veglian era emperder d'enconuscher e s'inscuntrar «fisicamain» cun las candidatas ed ils candidats. La procedura vegn perquai interrutta e l'ultima etapla da selecziun vegn spustada sin il zercladur 2020. Las candidatas/ils candidats ed ils gremis da RTR e la SRG SSR vegnan infurmad a moda cunvegna.

Il directur ad interim da RTR, Pius Paulin, maina vinavant il manaschi da RTR e surpiglia er vinavant la representanza entaifer la direcziun generala da la SRG SSR.

AGID SVIZZER PER LA MUNTOGNA
TEL. 01/712 60 60 FAX 01/712 60 50
www.berghilfe.ch info@berghilfe.ch

AIDE SUISSE AUX MONTAGNARDS
SCHWEIZER BERGHILFE
AIUTO SVIZZERO AI MONTANARI



Pir l'avust al «rudè» da Cuira

La bardigliada dals uffizis chantunals en la chasa Sinergia sa retarda

DAD AUGUSTIN BEELI/FMR

■ **Da principi fiss stà pront tut e nagut n'avess pudì disturbar il program da termin. Ussa ha dentant il coronavirus sfurzà dus departaments chantunals e 12 uffizis da spustar il project da bardigliar 400 plazzas da lavur.** «Quest project è cumbinà cun in'entira chadaina da problems che nus stuain resguardar», declara Markus Dünner, il manader da l'Uffizi chantunal da construcziun auta. Quest post chantunal s'occupa dapi l'entschatta dal project «Sinergia», latiers tutga er la bardigliada da 400 plazzas da lavur. I fiss stà previs da cumenzar ils 6 d'avrigl 2020. Tut che fiss stà pront da bandunar las localitads en il center da la citad e da midar en la nova chasa a la Ringstrasse.

Ina chadaina
da problems schliabels

Al «rudè» da Cuira resti entant anc quiet, almain en la chasa Sinergia. Damai ch'il coronavirus chaschuna ina malsegrezza globala, ha Dünner confermà sin dumonda da la FMR ch'il termin saja ussa spustà. Entant ch'ins na sappia betg co che la situaziun sa sviluppeschia, ha la squadra dal project «Sinergia» stui dar la preferenza a prioritads urgentas. Ins haja mess enavos il project da bardigliar, conferma Dünner a la FMR. L'uffizi ha orientà tut ils posts involvads ch'ins prendia en mira da midar il pli tard suenter las vacanzas da stad. Sco Dünner di, è il termin oriund dals 6 d'avrigl spustà sin ils 17 d'avust.

La chadaina da problems ch'èn da resguardar e che Dünner ha menziunà a l'entschatta ha connex cun las localitads veglias dals uffizis. Ina part dals biros èn en immobiglias ch'il Chantun ha affittà, autras s'audan a la cassa da pensiun u al



Vista en in dals biros da la chasa Sinergia a la via Ring 10.

FOTO I. RASP

Chantun. Tuttas localitads na sa svidan en scadin cas betg, Dünner numna in exempel: «L'Uffizi d'energia e traffic a la via Rohan mida en la Sinergia. En las localitads veglias vegn la Procura publica. Avant ston ins dentant anc adattar e renovar quellas.» Il medem scenari tar la chasa da l'administraziun chantunala a la via Graben 8. L'uffizi d'agricultura ed auters midan en la Sinergia. A la via Graben 8 – il bajetg vischin cun il Museum d'art – vegn l'Uffizi dal servetsch social a prender domicil. Quel è ussa anc en la chasa Neumühle a la via Gürtel 89. Avant che bardigliar sto il personal spetgar che las localitads èn prontas.

La chasa a la via Graben 8 è ina immobiglia chantunala che dovra suenter 40 onns ina sanaziun.

Il scenari da bardigliar, cun las dumondas tgi, tge, cura e co, è zunt vast e pretensius. Sch'i dat in retard u disturbi en lieu, ha quai consequenzas en in auter. Midar 400 plazzas da lavur cun infrastruttura diversa sumeglia in exercizi dal stab general. Per il termin nov dals 17 d'avust ha l'uffizi da construcziun auta fixà in program da termin stretg. «La chasa Sinergia vegn emplenida da sisum, vul dir da la tschintgavla auzada vers giudim. Tenor in plan detaglià ha mintga uffizi u departament in'emna temp da bardigliar. Sulettamain a l'Uffizi per la segirezza da victualias e sanadad d'animals han ins concedì duas emnas. Il labor chantunal è ussa anc a la via Planaterra, e midar in tal manaschi cun apparaturas per chemia e biologia n'è betg uschè simpel.

Tge uffizis midan?

Departament d'economia e fatgs socials; Departament da construcziun, traffic e forestalesser; Inspecturat dal register funsil e register da commerzi; Uffizi d'agricultura e da geoinformaziun; Uffizi per la segirezza da victualias e sanadad d'animals; Uffizi d'industria, mastergn e lavur; Uffizi d'economia e turissem; Uffizi per il svilup dal territori; Uffizi per la natura e l'ambient; Uffizi d'energia e traffic; Uffizi da guaud e privels da la natura; Uffizi da chatscha e pestga, Uffizi da construcziun auta, Centrala da stampats e material.

Titel d'onur per Fallet e Caluori

Federaziun grischuna dal sport da tir

DA GION NUTEGN STGIER/FMR

■ **Il tiradur da pistola Elmar Fallet è tiradur grischun da l'onn 2019. Valentina Caluori, la campionesa d'Europa cun l'arma da caliber pitschen survegnet quel titel d'onur tar ils giuven U21. Gia per la 30avla giada surdat la Federaziun grischuna dal sport da tir quel titel.** Dapi il 1990 surdat la Federaziun grischuna dal sport da tir (BSV) quel titel sin fundament dals buns resultats ad in tiradur activ ubain ad ina tiradura activa. Previ era da surdar quel premi tar la radunanza da delegads da l'uniun a la fin da favrer a Tavau. Quella ha dentant betg gi lieu pervia dal coronavirus. Ussa ha la federaziun dals tiradurs grischuns surdà ad Elmar Fallet (Müstair) ed a Valentina Caluori (Razén) il cristall sco renconuschientscha e sco simbol per il tiradur grischun da l'onn 2019 tar l'elita e tar ils giuven.

Per la
quarta giada

Fallet ha retschet fin ussa gia trais giadas il premi (2014, 2015 e 2016) ed ussa è vegni vitièr in ulteriur. Il tiradur da Müstair è uschè tiradur grischun da l'onn 2019, in'onur ch'il um da 47 onns ha pli che merità. Dapi intgins onns tutga el en Svizra tar ils pli ferm tiradurs da pistola e sin champ chantunal ha el bunamain nagina concurrenza. L'onn 2019 è Fallet stà campion grischun cun la pistola sin la distanza da 10 meters, 50 meters program A e B. Ultra da quai ha el er gudagnà en pliras categorias il final da la coppa da matsch. Tar il tir cham-

pester ha Fallet tratg da 180 puncts pussaivels 179 puncts e tar il tir obligatoric mantgantà il maximum da 200 puncts be per in punct. Ultra da quai è il pur e tiradur stà tar il tir chantunal d'Appenzell il pli sisum dil podest tar la concurrenza da festa. Per l'emprima giada ha il

BSV er surdà la distincziun en la categoria giuven U21. Quel premi vegn sponsorà da la Fundaziun Paul Accola da Tavau. Il 2018 era Caluori gia stada tiradura grischuna da l'onn. Ussa ha la tiradura da 20 onns retschet il premi tar ils giuven U21. Caluori è il 2019 vengnida du-

bla campionesa d'Europa tar ils campionadis europeans a Bologna cun l'arma da caliber pitschen tar ils juniors.

Ella ha gudagnà la concurrenza singula e quella dal team mixed. Vitièr è anc vengnida ina medaglia da bronz en la concurrenza da las nazions.



Onur er per Valentina Caluori, la tiradura dal cader nazional da juniors.

FOTOS G. N. STGIER